

Iruñeko XXI.



Udako Euskal Unibertsitatea

Emaitza positiboekin amaitu zen atzo Iruñean aurtengo edizioa

Bi aste hauetan 21 ikastaro eta beste ekitaldi asko izan dira Larraonan

Atzo amaitu zen Iruñeko Udako Euskal Unibertsitateko aurtengo edizioa, bi aste hauetan zehar 21 ikastaro eskaini ostean. Kepa Altonaga zuzendaria baikor agertu zen, eta hamabostaldiaren balorazio positiboa egin zuen. «Normaltasuna» nagusitu omen da XXI. edizio honetan, bai eskaintzaren bai partehartzearen aldetik.

T. SATRUSTEGI / IRUÑEA


«Pozik nago». Kepa Altonagak esaldi ezin adierazgarriagoa bota zuen atzo Larraonan aurtengo saioaren balantze positiboa egiterakoan. Edizioari bukaera emateko unean 21 urteko bidea, «historia luzea», aipatu zuen Altonagak. Iruñeko saioaz gain, Baionakoaz ere mintzatu zen UEUko zuzendaria: «Zortzigarren urtez egin dugu, emaitza honekin gainera, bai landu diren gaiengatik, bai partehartzeagatik. Osotara 90 lagun aritu dira, eta Iparraldeko errealitatea eza gututa, kopuru ona da».

Balantze edo balorazioa egiteko orduan, «normaltasuna» nabarmendu zuen Altonagak, «disenatuta geneuzkan programak modu onean bete baitira». Hala ere, bi hutsune izan direla azaldu zuen, Filosofia eta Pedagogia ikastaroak hain zuzen, matrikula faltagatik suspenditu baitziren.

HAMABOSTALDIAREN DATU ZEHATZAK

Markok EKBko idazkaria eta UEUn ere ari dena— adierazi zuenez, 609 lagunek hartu dute parte aurtengo UEUko ikastaroetan. «Hauek dira behintzat Administrazio pasatu direnak, baina beti daude handik pasatzen ez diren beste batzuk». Orokorrean, jende gaztea dela agertu zuen Markok: «Ehunetik 54ek 20 eta 30 urte bitarteko adina dute, eta % 26 30 eta 40 urte bitartekoak dira, beraz, nahiko gazteak».

Lanbideari dagokionez, gehiengoak zerikusia du Unibertsitatearekin, hau da, ikasle edo irakasleak dira. Era berean, Administrazio publikoko langile ugari daudela aipatu zuen, baita langabetuak ere. Partehartzaile gehienak euskaldun zaharrak dira, «baina azpimarratzekoa da euskaldun berrien kopurua, % 30 hain zuzen».



Euskarari buruzko mahaingurua UEUren aurtengo edizioan.

JOXE LACALLE

Larraona Ikastetxean egon diren gehienak, erdiak baino zerbait gehixeago, behin baino gehiagotan etorri izan dira, aurreko urtetan, eta % 44 lehen aldiz etorri dira aurtun. Kopuru hau «oso interesgarria da etorkizunari begira, beti dago jende berria», Iñaki Markoren hitzetan. Herrialdeka, gehienak bizkaitarrak dira, % 39, gero gipuzkoarrak, % 37. Nafarrak 80 izan dira, % 14, eta azpimarratu zuten datu bat izan zen Iparraldekoen partaidetza, «urtez urte igotzen ari den kopurua da, Baionan beste

saio bat izan arren». Aurtun, 15 lagun etorri dira Iparraldetik.

AURTENGO BALANTZE EKONOMIKOA

Ikasketei dagokienek, ikasle gehienek goi mailako titulazioa dute, baina hala ere, % 20k ez dute ikasketa unibertsitariorik. «Honek esan nahi du UEUk ez diela bere eskaintza unibertsitarioei bakar-bakarrak zuzentzen», Markoren esanetan.

Datu ekonomikoak, berriz, oraindik behin-behinekoak badira ere, Mari Karmen Menika

idazkariak azaldu zituen. Diru sarrera, orokorrean, 19 milioi t'erdia pezetakoa izan da (826.000 libera). Honen barruan matrikulak daude (7 milioi), Nafarroako Gobernuak eman duena (3,5 milioi), Eusko Jaurlaritzarena (5,5 milioi), Europako Elkarrekin (3 milioi), zenbait udalen laguntza (222.000 pezeta) eta Lankide Aurrezkiarena (276.000 pezeta).

Gastuak guztira 20 milioi t'erdikoak izan dira (891.000 libera), idazkariaren esanetan. Oraindik beste laguntza batzuen zain daudela azaldu zuen Menikak.

Kepa Altonaga: «UEU progresio nabarian dagoela esan dezakegu»

T. S. / IRUÑEA

«UEU urtez urte berritzen den mirakulua» dela adierazi zuen lehengo egunean Jose Ramon Etxebarria irakasleak, baina mirakulu horren atzetik «lan ezkutu handia» dagoela azaldu zuen atzo Kepa Altonagak. Hala ere, urtez urte mirakulu hau handitzen ari dela gaineratu zuen, «progresio nabaria dugula esan dezakegu».

Progresio hau zertan gausatzen den ere esplikatu zuen UEUko zuzendariak. Batetik, aspalditik programa zehatz batean ikastaro berriak sartzea ez dela batere erraza aipatu zuen, «baina aurtun sartu dugu ikastaro berri bat, Ikasketa Klasikoak hain zuzen, eta arrakastatsua izan da

gainera». Era berean, iaz egin ez ziren beste bi ikastaro izan dira aurtun, Bertsolaritza, eduki ezberdinarekin egin dena, ikuspegi guztiz teorikoa aztertuz, eta Itzulpenzaintza eta Interpretaritzaren ikastaroak.

Era berean, progresio hau ikastaroen sakontasunaren aldetik ere eman dela azpimarratu zuen Altonagak: «Gai monografikoak ugaltzen ari dira, honek esan nahi du gai zehatz baten inguruan astebeteko jardun osoa antolatu dela». Horrekin batera, sail batzuetan programa bikoiztu egin da, adibidez Glotodidaktikan eta Natur Zientzietan.

Honetaz gain, progresio hau beste alde batetik ere ikus daitekeela esan zuen: «Zifrak ikusita,



Kepa Altonaga.

A. BAYO

nabaria da gero eta jende gehiago datorrela unibertsitatearekin lotura duena». UEUk euskara eta unibertsitatea uztartu nahi dituenaz, hori progresioa dela ziurtatu zuen Altonagak.

39 urteko zigorra atzetik zihoakion polizia hiltzeagatik

BILBO

Bilboko Entzutegiak 39 urteko zigorra ezarri dio Manuel Moya Rodriguez Barberori 1991. urtean farmazia batean lapurtu ostean atzetik segika joan zitzaien polizia hiltzeagatik. Heriotza delituaz gain, lapurretara eta legez kanpo armak izatea ere egotzi dizkio Entzutegiak akusatuari.

Jarritako zigorraz gain, poliziaren emazteari eta semei kalteordaina eman beharko die Manuel Moyak. Alargunari zortzi milioi pezeta ordainduko dizkio eta bi semei bostna milioi. Moyaren laguna ere, Victoria Velasco Martinez, epaitu dute eta legez kanpo armak izateagatik urtebeteko kartzela zigorra jarri diote.

Epaitutako gertaerak 1991ko azaroaren 29an izan ziren. Egun horretan, Manuel Moya, aurrekari penalduna eta toxikomanoa, Bilboko Autonomia kaleko farmazia batean sartu zen eta 10.000 peseta lapurtu zituen. Bertan zegoen emakume baten oihuak entzunda bi gizon Moyaren atzetik atera ziren. Une berean, Emilio Garcia polizia gertakarien tokian zegoen paisanoz jantzita eta identifikazio plaka atera ondoren lapurraren atzetik joan zen korrika.

Ihesaldian, metro bateko distantziatik lau tiro eman zizkion Moyak Garcia. Tiroek eragindako zauriek berehalako heriotza ekarri zioten Emilio Garcia poliziari. Manuel Moyak ihes egitea lortu zuen.

Gaizkileak lapurtutako diruarekin droga erosi zuen. Moyak Victoria Velasco bere lagunari gertatutakoa kontatu ondoren, Valentziarako bidea hartu zuten biak. Bertan, 1991ko abenduaren 5ean detentatu zituzten. Une hartan eskutan pistola zeraman Victoria Velascok.

Epaimahaiak, forentsean iritziarekin bat eginenez, gaixotasun mentalen arrastorik ez dagoela adierazi du. Buru nahasteren bat izatekotan akusatua toxikomaniak eragina izango litzateke forentsearen ustez. Defentsako letratuak, Angel Gamindek, epaia Epaitegi Nagusiaren aurrean errekurrituko duela esan du.